

Jane Hutt AS

Y Gweinidog Cyfiawnder Cymdeithasol a'r Prif Chwip

5 Gorffennaf 2023

Annwyl Jane,

Gwaith craffu ariannol yn ystod y flwyddyn: 2023-24

Diolch i chi am dderbyn ein cais i ddefnyddio ein sesiwn graffu a drefnwyd ym mis Medi ar gyfer eich cyfraniad i'n hymchwiliad i atal trais ar sail rhywedd drwy ddulliau iechyd y cyhoedd. Fodd bynnag, mae hynny'n golygu na fydd ein sesiwn graffu gyffredinol arfaethedig yn mynd yn ei blaen mwyach. Byddem felly'n croesawu cael ymateb ysgrifenedig i'r canlynol, gan gynnwys diweddariadau i'r argymhellion a wnaed yn ein hadroddiad ar [Gyllideb Ddrafft 2023-24](#), ac adroddiadau eraill:

Costau byw

- Parodrwydd Llywodraeth Cymru ar gyfer yr heriau costau byw a fydd yn codi'r gaeaf hwn ac unrhyw gamau ychwanegol y gallech eu cymryd i helpu'r aelwydydd sydd fwyaf agored i niwed?
- A yw'r Grŵp Arbenigol ar Gostau Byw wedi gwneud ei argymhellion i Lywodraeth Cymru eto? Os felly, pryd y gallwn ddisgwyl iddynt gael eu rhannu â'r Pwyllgor (gweler hefyd yr [ymateb](#) i'r adroddiad ar Gyllideb Ddrafft 2023-24).
- A fydddech cystal a darparu manylion monitro'r gyllideb ar alw'r Gronfa Cymorth Dewisol (neu'r DAF)? A yw'r dyraniadau a wnaed yn y gyllideb ddrafft ar gyfer 2023-24 wedi'u diwygio mewn ymateb i' ganlyniad y gwaith monitro hwnnw?
- A yw gwerthusiad y Gronfa Gyngori Sengl wedi'i gwblhau, ac os felly a ellir ei rannu â'r Pwyllgor?
- Yn unol ag argymhelliad 10 yn ein hadroddiad [Anghynaliadwy: dyled o ganlyniad i gostau byw cynyddol](#), ac argymhelliad 6 yn ein hadroddiad ar Gyllideb Ddrafft 2023-24, pryd rydych chi'n disgwyl y byddwch yn cyhoeddi ffigurau terfynol ynghylch y nifer sy'n defnyddio'r Cynllun Talebau Tanwydd yn erbyn y targedau a osodwyd pan lansiwyd y cynllun, mewn perthynas â mesuryddion rhagdalau ac aelwydydd oddi ar y grid?

Trais yn erbyn menywod, cam-drin domestig a thrais rhywiol a menywod mudol

- Derbyniodd Llywodraeth Cymru argymhelliad 3 o'n hadroddiad [Trais yn Erbyn Menywod, Cam-drin Domestig a Thrais Rhywiol: menywod mudol](#) i gefnogi menywod mudol sydd Heb Hawl i Gyllid Cyhoeddus, ac rydym yn croesawu eich datganiad ar 4 Gorffennaf 2023 sy'n cadarnhau cynllun peilot y Gronfa Gymorth i Fudwyr sy'n Ddiodefwr Trais. Derbyniodd Llywodraeth Cymru hefyd argymhelliad y Pwyllgor yn ei adroddiad ar y Gyllideb Ddrafft ar gyfer 2023-24, y dylai egluro sut caiff y gronfa argyfwng ei hariannu. Rydym yn deall y bydd adnoddau'n cael eu dargyfeirio o'r gyllideb trais yn erbyn menywod, cam-drin domestig a thrais rhywiol (VAWDASV) bresennol. A fyddech cystal â chadarnhau faint sydd wedi'i ddyrannu i'r gronfa a'r sylfaen dystiolaeth ar gyfer pennu'r ffigur hwnnw. Pa asesiad, os yn berthnasol, y mae Llywodraeth Cymru wedi'i gynnal i asesu effaith dargyfeirio adnoddau o wasanaethau a gweithgarwch VAWDASV presennol. Fel arall, a fyddech cystal â rhoi manylion o ble y gwnaed y toriadau.

Cydraddoldeb a hawliau dynol

- Nodwch effaith y gostyngiad yng nghyllid yr UE ar sefydliadau sydd wedi'u lleoli yng Nghymru, yn benodol Chwarae Teg a Chyngor Gweithredu Gwirfoddol Cymru. Pa asesiad a wnaed o'r effaith ar gyflawni cynlluniau Llywodraeth Cymru ar gydraddoldeb. Pa ystyriaeth a roddwyd i ddatblygu ffrydiau ariannu newydd i lenwi'r bwlch yng nghyllid yr UE?

Profiadau menywod yn y system cyfiawnder troseddol

- Fel y cyfeiriwyd ato yn ein hadroddiad [Profiadau menywod yn y system cyfiawnder troseddol](#), a allwch gadarnhau a oes unrhyw gostau wedi'u datblygu ar gyfer cynllun peilot y Ganolfan Breswyl i Fenywod arfaethedig, gan gynnwys yr effaith ariannol ar wasanaethau cyhoeddus lleol.
- Allwch chi gadarnhad p'un a oes ffrwd ariannu gynaliadwy ar gyfer canolfannau menywod bellach yn ei lle.
- A yw'r tendr ar gyfer y Fanyleb Dull System Gyfan y Rhaglen Fraenaru i Fenywod newydd, a grybwyllwyd mewn ymateb i argymhelliad 5, bellach wedi'i gyhoeddi?

Gwella'r gyllideb

- A fyddech cystal â rhoi diweddariad ar argymhelliad 10 yn adroddiad Cyllideb Ddrafft 2023-24? A allwch nodi pa gamau a gymerwyd i ddatblygu eich gwaith ar atal?
- Gofynnwn i chi ailystyried eich safbwynt ar argymhellion 11 a 12 yn adroddiad Cyllideb Ddrafft 2023-24, a wrthodwyd ar y pryd. Rydym yn pryderu nad yw cyhoeddi crynodeb



o dystiolaeth ysgrifenedig yr holl Weinidogion i bwyllgorau craffu'r Senedd ar ddyraniadau o fewn pob Prif Grŵp Gwariant yn ymateb digonol i'n hargymhelliad. Hoffem weld sut ydych chi'n bwriadu darparu mwy o eglurder a thryloywder yn y ffordd y cyflwynir cyllideb y flwyddyn nesaf. Sut ydych chi'n bwriadu mynd i'r afael â beirniadaeth o'r dull presennol o gynnal Aseidiadau Effaith Strategol? A wnewch chi ymrwymo i gyhoeddi dadansoddiad dosbarthiadol gyda Chyllideb Ddrafft 2024-25?

Edrychaf ymlaen at gael eich ymateb

Yn gywir

A handwritten signature in black ink that reads "Jenny Rathbone". The signature is written in a cursive style with a large initial 'J'.

Jenny Rathbone AS

Cadeirydd y Pwyllgor Cydraddoldeb a Chyfiawnder Cymdeithasol

